

COMUNICATO n. 536 del 08/03/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda ai 8 de mèrz vegn fora la puntata #476 del program ladin per la television

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata 476. I argomenc de chesta setemèna l é: la Dì internazionèla de la malaties rères: na ocajion de sensibilisazion e speranza.

En ocajion de la Dì internazionèla de la malaties rères, stata ai 28 de firé, i Servijes sozio-assistenziei del Comun General de Fascia i à volù endrezèr n domesdi de sensibilisazion dintornvia l argument coi tusc de la clasc secondes de la scoles mesènes de Ciampedel. Tras testimonianzes en pruma persona se à volù sparpagnèr consapevoleza anter chisc joegn, per soscedèr empatia e per ge insegnèr l'emportanza de l'inclujion e del respet. L é stat sottrissà ence l'emportanza de la enrescida scientifica su la malaties rères e apontin per la sostegnir ge é stat consegnà al Dipartiment de Biologia Cellulare, Computazionale e Integrata de Trent la donazions binèdes su per la diagnosa de la malaties rères; l Carnascèr de Ciampedel l é stat viventà da mèscres tradizionèles dassen curioses de gra al Istitut cultural ladin Majon di Fascegn. Dessema co la Diretora del Istitut Cultural Ladin Sabrina Rasom capiron l significat simbolich de Jan Deluvio e de la Catertempora; ai 3 de mèrz, a Sèn Jan l é stat endrezà da l'Autorità per la Mendranzes linguistiches de la Provinzia de Trent na scontrèda de confront anter istituzions. Al apuntament l é stat envià a tor pèrt i raprejentanc de la istituzions de Fascia dessema con raprejentanc provinzièi e regionèi per fèr fora argomenc e aspec de enteres per l stravardament de la Comunanza Ladina. L é stat rejonà de politiches abitatives, de ejames de zertament del lengaz e de la cultura ladina e de toponomastica; la Crousc Checena de Fascia e Fiem la met endò a jir i corsc de formazion per neves socoridores.

Ai 13 de mèrz pearà via l corsc de formazion che l jirà inant enscin ai 18 de oril. La formazion per neves volontères la vegn metuda a jir te la senta de la Crousc Checena de Ciavaleis, ma per i volontères de Fascia sarà l met de tor pèrt online aló da la sentes de Vich e de Moena. Per se enscinuèr ai corsc se pel tor su l qr code che se troa sui placac che l é fora per la val opuramenter su la piata Facebook de la Sociazion.

I report de chesta setemèna, enjigné da Sabrina Riz, i vegn porté dant da la ousc de Sabrina Riz.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Sudtirolo, “Pedies” l va fora su Trentino Tv – canal 10 de TN- vigni sabeda da les 18.00 (sie da sera), de domenia da les 13.30 (mesa la does domesdi) e de lunesc da les 11.30 (mesa les doudesc).

L program ades l va fora ence sun AltoAdige TV – canal 11 de BZ - vigni domenia da les 18.00 (sie da sera).

Traduzion di Servijes Linguistics e Culturèi del Comun general de Fascia

(cdt)